

Նոր խմբագրությամբ գրանցված է

Հայաստանի Հանրապետության
Կենտրոնական բանկում

Նախագահ՝ Արթուր Ջավադյան

« __ » _____ 2010թ.

2011թ. հունվարի 25-ի
փոփոխություններով և լրացումներով

**ՆԱՍԴԱՔ ՕԷՍԷՔՍ ԱՐՄԵՆԻԱ
ԲԱՑ ԲԱԺՆԵՏԻՐԱԿԱՆ ԸՆԿԵՐՈՒԹՅՈՒՆ**

**ԿՈՐՊՈՐԱՏԻՎ ԱՐԺԵԹՂԹԵՐԻ
ԱՌԵՎՏՐԻ ԿԱՆՈՆՆԵՐ**

Գլուխ 1. Հասկացություններ

- 1) Սույն կանոններում կիրառվող հասկացություններն ունեն սույն գլխով սահմանված նշանակությունները:
- 2) **«Լոտ»**. գնման կամ վաճառքի հայտում նշվող՝ կորպորատիվ արժեթղթերի նվազագույն քանակություն: Առևտրին թույլատրված բոլոր կորպորատիվ արժեթղթերի համար մեկ Լոտը պարունակում է մեկ արժեթուղթ:
- 3) **«Հաշվարկային գին»**. նախորդ առևտրային օրվա ընթացքում թողարկողի տվյալ դասի կորպորատիվ արժեթղթերով կնքված վերջին գործարքի գինը: Եթե նախորդ առևտրային օրվա ընթացքում թողարկողի տվյալ դասի արժեթղթերով գործարք չի կնքվել և նախորդ առևտրային օրվա համապատասխան առևտրային նստաշրջանի փակման պահի դրությամբ առևտրային համակարգում առկա լավագույն գնման հայտում նշված գինը հաշվարկային գնից բարձր է (լավագույն վաճառքի հայտում նշված գինը հաշվարկային գնից ցածր է), ապա այդ հայտում նշված գինն է սահմանվում որպես հաշվարկային գին տվյալ առևտրային օրվա համար: Այն դեպքում, երբ նախորդ առևտրային օրվա ընթացքում թողարկողի տվյալ դասի արժեթղթերով գործարք չի կնքվել և չի ներկայացվել այնպիսի հայտ, որը հիմք կհանդիսանար հաշվարկային գին սահմանելու համար, այդ դեպքում տվյալ առևտրային օրվա համար հաշվարկային գին է համարվում նախորդ առևտրային օրվա համար սահմանված հաշվարկային գինը: Այն դեպքում, երբ 5 (հինգ) հաջորդական առևտրային օրերի ընթացքում գործարք չի կնքվում կամ այնպիսի հայտ չի ներկայացվում, որը հիմք կհանդիսանար հաշվարկային գին սահմանելու համար, այդ դեպքում տվյալ առևտրային օրվա համար հաշվարկային գին չի սահմանվում:
(3-րդ կետի փոփոխությունը գրանցված է ՀՀ կենտրոնական բանկում 30.11.2010թ.)
- 4) **«Սպրեդ»**. թողարկողի տվյալ դասի կորպորատիվ արժեթղթերի գնման (վաճառքի) լավագույն գնի և/կամ Հաշվարկային գնի նկատմամբ առևտրային համակարգ մուտքագրվող գնման (վաճառքի) հայտերի գների տարբերության առավելագույն թույլատրելի սահման:
- 5) Սույն կանոններում կիրառվող այլ հասկացություններն ունեն «Արժեթղթերի շուկայի մասին» ՀՀ օրենքով և Օպերատորի կանոններով սահմանված նշանակությունները:

Գլուխ 2. Կորպորատիվ արժեթղթերով գործարքների կնքումը

- 1) Օպերատորի առևտրային համակարգում կորպորատիվ արժեթղթերով գործարքներ կարող են կնքվել առևտրային նստաշրջանի ընթացքում՝ Օպերատորի «Առևտրի ընդհանուր կանոններով» և սույն գլխով սահմանված կարգով:
- 2) Բաժնետոմսերով առևտուրը Օպերատորը կազմակերպում է հետևյալ հարթակներում՝
 - ա) ցուցակված բաժնետոմսերի հարթակ,
 - բ) ազատ շուկայի գործիքների հարթակ:
- 3) Կորպորատիվ պարտատոմսերով առևտուրը Օպերատորը կազմակերպում է հետևյալ հարթակներում՝
 - ա) ցուցակված պարտատոմսերի հարթակ,
 - բ) ազատ շուկայի գործիքների հարթակ,
 - գ) դրամական շուկայի գործիքների հարթակ:
- 4) Սույն գլխի 2) և 3) կետերում նշված հարթակներում առևտուրը կազմակերպվում է բացման աճուրդի և երկկողմանի անընդհատ աճուրդի եղանակով:
(4-րդ կետի փոփոխությունը գրանցված է ՀՀ կենտրոնական բանկում 30.11.2010թ.)
- 5) Օպերատորի գործադիր մարմնի ղեկավարի որոշմամբ նախատեսված դեպքերում բաժնետոմսերը և կորպորատիվ պարտատոմսերը կարող են շրջանառվել նաև հասցեական գործարքների հարթակում և ռեպո գործարքների հարթակում:
- 6) Օպերատորը կորպորատիվ արժեթղթերով առևտուրը կազմակերպում է լրիվ նախնական դեպոնացման պայմաններում:
- 7) Լրիվ նախնական դեպոնացման պայմաններում կազմակերպվող՝ կորպորատիվ արժեթղթերով գործարքների կնքումն իրականացվում է սույն գլխի 8) և 9) կետերում սահմանված առանձնահատկություններով:
- 8) Շուկայի մասնակիցների կողմից Օպերատորի և Դեպոզիտարիայի միջև կնքված պայմանագրով և Դեպոզիտարիայի կանոններով սահմանված կարգով կատարված լրացուցիչ դեպոնացումների դեպքում համապատասխան չափով ավելացվում են

- դեպոնացված կորպորատիվ արժեթղթերի և/կամ դրամային միջոցների մնացորդները: Դեպոզիտարիայից մինչև ժամը 11:15-ը և 12:45 ստացված տվյալների հիման վրա առևտրային համակարգում Օպերատորը համապատասխանաբար ժամը 11:30-ին և 13:00-ին ավելացնում է Շուկայի մասնակիցների՝ դեպոնացված միջոցների մնացորդները:
- 9) Առևտրի մասնակիցը կարող է իր տերմինալից (հեռացված տերմինալից) ամբողջությամբ կամ մասնակի ապադեպոնացնել Շուկայի տվյալ մասնակցի դեպոնացված դրամային միջոցների՝ առևտրային համակարգում տվյալ պահին առկա և ազատ (չարգելադրված) մնացորդը կամ դրա մի մասը, որի դեպքում ապադեպոնացված միջոցների չափով նվազեցվում է դեպոնացված դրամային միջոցների մնացորդը:
 - 10) Օպերատորը առևտրային նստաշրջանի ընթացքում ժամը 11:30-ին և 14:00-ին ստուգում է սույն գլխի 7) կետին համապատասխան առևտրի որևէ մասնակցի կողմից առևտրային համակարգում Շուկայի տվյալ մասնակցի առկա դրամային միջոցների (դրանց մի մասի) ապադեպոնացում կատարելու փաստը: Ստուգման արդյունքում եթե պարզվում է, որ առևտրի որևէ մասնակցի կողմից ստուգմանը նախորդող ժամանակահատվածի (11:00-ից 11:30-ը, 11:30-ից 14:00-ը) ընթացքում կատարվել է միջոցների ապադեպոնացում, ապա Օպերատորը 15 (տասնհինգ) րոպեի ընթացքում պատրաստում և Դեպոզիտարիային է տրամադրում կատարված ապադեպոնացումների մասին տվյալները: Ժամը 14:00-ից հետո կատարված ապադեպոնացումները բացի առևտրային համակարգում դրանց մնացորդների նվազեցումից որևէ այլ հետևանք չեն առաջացնում, իսկ ապադեպոնացված համապատասխան միջոցները Շուկայի համապատասխան մասնակցի(ների) իրավասու հաշիվներին փոխանցվում են ընդհանուր կարգով՝ վերջնահաշվարկի իրականացման ժամանակ:
 - 11) Կորպորատիվ արժեթղթերով առևտրի ընթացքում առևտրի մասնակիցները առևտրային համակարգ հայտերը պետք է մուտքագրեն՝ նպատակ ունենալով բավարարել դրանք:
 - 12) Առևտրային համակարգ մուտքագրվող գնման և վաճառքի հայտերը պետք է ներկայացվեն այնպիսի գնով, որը համապատասխանում է տվյալ արժեթղթի ընթացիկ շուկայական արժեքին:
 - 13) Ընթացիկ շուկայական արժեքն այն գինն է, որը բազմակողմանի գնահատումից հետո արտահայտում է արժեթղթի առավել ճշգրիտ իրական գինը: Ընթացիկ շուկայական արժեքը որոշելիս պետք է հաշվի առնել արժեթղթի գնի փոփոխությունը ընթացիկ և նախորդ առևտրային նստաշրջաններում, արժեթղթի գնի տատանողականությունը, ընդհանուր առմամբ նմանատիպ արժեթղթերի գների տատանումները, անհրաժեշտության դեպքում նաև այլ պայմաններ, որոնք թույլ կտան որոշել ճշգրիտ ընթացիկ շուկայական գինը:
 - 14) Տվյալ առևտրային նստաշրջանի ընթացքում չբավարարված հայտերը չեղյալ են համարվում և հաջորդ առևտրային նստաշրջանում չեն ընդգրկվում համապատասխան Հերթերում:

Գլուխ 3. Սպրեդ

- 1) Երկկողմանի անընդհատ աճուրդի և բացման աճուրդի եղանակով կորպորատիվ արժեթղթերով կազմակերպվող առևտրի համար սպրեդը լավագույն հայտի գնի նկատմամբ սահմանվում է տվյալ պահին հայտերի համապատասխան հերթում ընդգրկված վաճառքի (գնման) լավագույն գնի ± 10 տոկոսը, ընդ որում՝ առևտրային համակարգում չեն գրանցվում գնման այն հայտերը, որոնցում նշված մեկ լոտի գինը տվյալ պահին առևտրային համակարգում գրանցված գնման լավագույն գնի համեմատ պակաս է 10-ից ավելի տոկոսով, և վաճառքի այն հայտերը, որոնցում նշված մեկ լոտի գինը տվյալ պահին առևտրային համակարգում գրանցված վաճառքի լավագույն գնի համեմատ ավել է 10-ից ավելի տոկոսով:
(1-ին կետի փոփոխությունը գրանցված է ՀՀ կենտրոնական բանկում 30.11.2010թ.)
- 2) Երկկողմանի անընդհատ աճուրդի և բացման աճուրդի եղանակով ցուցակված արժեթղթերի հարթակում բաժնետոմսերով կազմակերպվող առևտրի համար սպրեդը Հաշվարկային գնի նկատմամբ սահմանվում է Հաշվարկային գնի ± 15 տոկոսը, ընդ որում՝ առևտրային համակարգում չեն գրանցվում այն հայտերը, որոնցում նշված մեկ լոտի գինը Հաշվարկային գնի համեմատ ավել կամ պակաս է 15-ից ավելի տոկոսով:
(2-րդ կետի փոփոխությունը գրանցված է ՀՀ կենտրոնական բանկում 30.11.2010թ.)
- 3) Հասցեական գործարքների հարթակում ցուցակված արժեթղթերով կազմակերպվող առևտրի համար սպրեդը լավագույն հայտի գնի նկատմամբ սահմանվում է տվյալ պահին երկկողմանի անընդհատ աճուրդի եղանակով ցուցակված արժեթղթերի հարթակում տվյալ ֆինանսական գործիքով ներկայացված լավագույն հայտերի գների ± 10 տոկոսը, ընդ որում՝ առևտրային

համակարգում չեն գրանցվում այն հասցեական առաջարկները, որոնցում նշված մեկ լոտի գինը տվյալ պահին առևտրային համակարգում գրանցված գնման (վաճառքի) լավագույն գնի համեմատ պակաս (ավել) է 10-ից ավելի տոկոսով:
(3-րդ կետի փոփոխությունը գրանցված է ՀՀ կենտրոնական բանկում 24.02.2010թ.)

Գլուխ 4. Կորպորատիվ արժեթղթերով կնքված գործարքների կատարումը

- 1) Կորպորատիվ արժեթղթերով առևտրային համակարգում կնքված գործարքների արդյունքում ծագած՝ փոխադարձ պարտավորությունների և պահանջների որոշումը, հաշվանցումը, վճարահաշվարկային փաստաթղթերի պատրաստումն ու վերջնահաշվարկի կատարումն իրականացվում է գործարքի կնքման օրը՝ Օպերատորի և Դեպոզիտարիայի միջև կնքված պայմանագրով և Դեպոզիտարիայի կանոններով սահմանված կարգով:
- 2) Կորպորատիվ արժեթղթերի առևտրային նստաշրջանի ավարտից հետո Օպերատորի և Դեպոզիտարիայի միջև կնքված պայմանագրին համապատասխան Օպերատորը Դեպոզիտարիային է փոխանցում կնքված գործարքների վերաբերյալ տեղեկությունները, որոնց հիման վրա Դեպոզիտարիան իր կանոններով սահմանված կարգով իրականացնում է կնքված գործարքների վերջնահաշվարկը:
- 3) Շուկայի մասնակիցները, որոնց կազմում կամ անունից հանդես են գալիս գործարքի կողմ հանդիսացող առևտրի մասնակիցները, պարտավոր են Օպերատորին վճարել Օպերատորի «Սակագների մասին կանոններով» սահմանված համապատասխան միջնորդավճարները:

Գլուխ 5. Կանոններում փոփոխությունները և լրացումները

- 1) Սույն կանոններում փոփոխություններն ու լրացումները դրա անբաժանելի մասն են և ուժի մեջ են մտնում օրենքով սահմանված կարգով, եթե այլ բան սահմանված չէ սույն կանոններով:
- 2) Սույն կանոնները նոր խմբագրությամբ ուժի մեջ են մտնում ՀՀ կենտրոնական բանկում գրանցվելուց հետո՝ Օպերատորի գործադիր մարմնի ղեկավարի որոշմամբ սահմանված օրը՝ սույն կանոնների նոր խմբագրությամբ նախատեսված փոփոխությունների կիրարկումն ապահովող բոլոր փաստաթղթերի և պայմանագրերի ստորագրումից հետո:

Հաստատված է
«ՆԱՍԴԱԶ ՕԷՍԷՔՍ ԱՐՄԵՆԻԱ» ԲԲԸ
դիտորդ խորհրդի որոշմամբ

_____ **Արմեն Մելիքյան**

«16» նոյեմբերի 2009թ.
ք. Երևան
ՀՖԲ-01/120Լ